

V 9
1228



215
Q



QK. 215.

QK 215.

12

Vg

1228

Unterricht vnd Ser-

manung auff's newe Jar/so ich
vor zweien jaren den grossen Herrn
dieser Welt geschanckt
habe.

Niclas von Amsdorff.

Psal. 24.

Machet die Thore weit/ vnd die Thüre in der
Welt hoch/das der König der Ehren einziehe.


Psal. 2.

SO lasst euch nu weisen / jr Könige / vnd lasst
euch züchtigen jr Richter auff Erden.

Dienet dem **HERREN** mit furcht/ vnd frewet
euch mit zittern.

Küffet den Son / das Er nicht zürne / vnd
jr vmbkomet auffm wege / Denn sein zorn wird
bald anbrennen. Aber wol Allen / die auff In-
trauen.

1555.



[Faint, illegible handwriting in a historical script, possibly Latin or German, covering the majority of the page.]

[Faint circular stamp or seal impression, possibly containing a date or library name.]



Unterricht vnd Ermahnung auff's
neue Jar / so ich vor zweien jaren den
grossen Herrn dieser Welt ge-
schanckt hab.

Niclas von Amstdorff.



Or zweien jaren / hab ich
den grossen Herrn in dieser Welt/
zu irem besten / ein gut / seligs new
Jar geschanckt / Aber solchs ha-
ben sie nicht allein veracht / son-
dern auch stracks dawider ges-
than vnd gehandelt.

Nemlich / das sie die fromen / trewen Predi-
ger / so Gottes wort von beider gestalt des Sacra-
ments predigen / vnuerhört vnd vnüberwunden /
verdammnen / veriagen / ja an viel Orten würgen
vnd ermorden / welchs fürwar greulich vnd ers-
schrecklich zu hören ist.

Denn wer hat von Türcken / Heiden / Tars-
tern / oder sonst irgend von ein Volck / je gehört
oder erfahren / das es seines eigenen Gottes Eere /
gesetz befelh vnd gebot verdampt vnd verfol-
get hat? Wie die Papisten vnser lieben D^{er}ren
Ihesu Christi gebot vnd befelh von beider gestalt
des heiligen vnd hochwürdigen Sacraments vers-
folgen vnd verdammnen / vnd die Leute / so solch sein
Gebot vnd befelh halten / vnd iren lieben Gott vnd

A ij

D^{er}ren

DErren Ihesu Christo gehorsam sind / veriazen
vnd erwürgen.

Wilt auch der Türck / wie ein grausamer Ty-
rann er ist / irgend ein Menschen / darumb das er
Machomets gesetz helt / veriagt oder erwurget ?
Wie kömpts denn / das die Fürsten vnd Herrn
in der Christenheit ire Vnterthan / so Ihesu Christi
vnfers lieben **D**Erren vnd Gottes befehl vnd gebot
von beider gestalt des heiligen hochwürdigen Sa-
craments halten / vmb des Paps willen verdam-
nen / veriagen vnd ermorden ?

Wir heissen je darumb Christen / das wir
Christi vnfers lieben **D**Erren gebot / Eere vnd ge-
setz halten sollen / vnd haben den Namen danon /
Wie Franciscaner iren namen von Francisco ha-
ben / Darumb das sie seine Regel halten. Were nu
das nicht grewlich vnd erschrecklich / das die
Münche einen darumb tödten vnd erwürgeten /
das er ire Regel / die er zu halten gelobt hat / vleissig
vnd treulich hielte ? Warumb veriagen vnd er-
würgen denn die Fürsten / die armen Christen / so in
der Tauffe gelobt vnd geschworen haben / Christi
vnfers lieben **D**Erren Regel / gebot vnd befehl zu
halten ?

Ich kan vnd weis kein ander vrsach anzuzei-
gen / warumb sie es thun / denn allein vmb des Paps
willen / der seines Gottes vnd **D**Erren Ihesu Chris-
ti gebot vnd befehl verboten / vnd da wider die eine
Gestalt eingesatzt vnd geboten hat.

Ist aber das nicht grewlich vnd erschreck-
lich zu hören / das man vmb eins armen sterblichen
Menschen

Menschen gebots willen / Gottes wort gebot vnd
befelch verbieten vnd verdamnen sol? Vnd vber
Menschen gebot herter halten / denn vber Gottes
gebot / Vnd also den verdampften Menschen der
sünde / vñ Kind des verterbens vber Gott hebt vnd
setzt? Were es doch kein wunder / das sich die Er-
de auffhete / vnd vns alle verschlünge. Schemet
ir euch nicht / in ewer Dertz / das ir den Papsst mit
seinen Bischouen vnd Cardinelen vber Christum
vnd seine Aposteln setzen vnd heben solt? Wer ist
mehr / Christus warer Gott vnd Mensch / oder der
Papsst? Wem sol man mehr glauben / Christo Got-
tes Son / oder dem Papsst / der sein Widerwertiger
ist / 2. Thess. 2? Sind die Cardinel höher zu ach-
ten vnd halten / denn die Apostel? Schemet ir
euch nicht schier / vnd werdet schamrot?

SOL nicht der Papsst / mit seinen Mespfaffen /
Christo vnserm lieben **HERN** gehorsam sein? vnd
des gebot vñ befelch / als sein Schüler vnd Jünger /
trewlich vnd vleissig halten? Hat Gott der him-
lische Vater nicht vns allen geboten vnd befolhen /
das wir sein Wort hören vnd seine Gebot halten
sollen? Da Er spricht / Das ist mein geliebter
Son / an dem ich ein wolgefallen habe / **DER** solt
ir hören / Den Den / vnd keinen andern.

Aber vielleicht gehen den Papsst diese Wort
nicht an / er ist mit seinen Mespfaffen vielleicht das
von ausgeschlossen / das er Christo seinem **HERN**
nicht darff folgen / noch gehorsam sein. Warumb

A ij

solc

solt er Christus / des lebendigen Gottes Sons
wort/ gebot vnd befelch halten? Er ist dazu viel zu
hoch vñ herrlich / dieweil er drey güldene Kronen/
vnd Christus vnser lieber D^Err nur ein Krone von
Dornen/tregt.

ICh meinte aber für meine einfalt/ wir hies-
sen Christen daher (wie gesagt) das wir Christi
vnser lieben D^Errn wort / gebot vnd befelch hal-
ten soltē / So faret jr zu / verdampft vnd veriagt vns/
das wir Ihesu Christo vnserm lieben D^Errn vnd
Gott gehorsam sind / seine Gebot vnd befelch hal-
ten. O wehe euch / jr wolt willig mit der Babylo-
nischen Duren vnd irem Thier / das sie tregt / in
feurigen Pful geworffen werden.

ISts nicht grausam vnd erschrecklich zu hö-
ren / das jr den Papsst / mit seinen Mespfaffen / so
hoch hebt vnd ehret / allein darumb / das er Chri-
sti vnser lieben D^Errn wort / gebot vnd befelch
von beider gestalt des heiligen Sacraments / als
ein newe Lere vnd Ketzerrey lestert / schendet / vers-
beut vnd verdammet / Vnd derhalben die fromen
trewen Prediger Christi / so sein heilig wort / gebot
vnd befelch leren vnd predigen / veriagt vnd erwür-
get .

Was kündet jr doch gewlichers thun auff die-
ser Welt / denn das jr des Papssts wort / gebot vnd
befelch so emsig vnd vleissig haltet / vnd andern zu
halten gebietet / Vnd widerumb Christi vnser lie-
ben

ben **H**errn gebot vnd befelß verachtet/ verdampt
vnd ewren vnterthanen zu halten verbietet/
zwingt vnd dringt die Leute mit gewalt/ Gott vnd
Christum zu verleugnen / vnd dem Papst gehor-
sam zu leisten vnd anzubeten? Was wollen vnd
werden doch vnser Nachkomen von euch sagen
vnd schreiben?

In freilich werden sie sagen / singen vnd
schreiben/ Das jr ein Menschen vber Gott hebt/ vñ
Gott vnter ein Menschen setzt / Den Papst vber
Christum erhöhet/ vnd Christum vnter den Papst
setzt/ nemlich/ in dem/ das jr Gottes wort/ gebot
vnd befelß von beider gestalt/ als ein newe/ falsche
Lere lestert/ schendet vnd verdammet/ vnd die Leute/
so solche wort vnd lere gienben/ Gott vnd Christo
irem **H**errn gehorsam sind / veriagt vnd erwür-
get/ Vnd dagegen eins armen Menschen wort/ ge-
bot vnd befelß ehret/ lobet vnd preiset / höher vnd
thewrer achtet/ denn des lebendigen Gottes wort/
gebot vnd befelß/ vnd die selbigen nicht allein für
euch selbs haltet/ Sondern auch die Leute solche
Menschen trewme zu halten dringet vnd zwinget.

O Wie schön ehre/ lob vnd preis werdet jr des
bey vnsern Nachkomen haben / sonderlich aber
am Jüngsten tage für Gott/ Christo vnd allen sei-
nen Engeln / Faret nur fort / jr seid auff rechter
Bahn zum feurigen Pful.

In rhümet in allen ewren Mandaten /
vnd

vnd Edicten / ewere Mönche vnd Pfaffen schreien vnd brüllen / man wil die Sache vertragen / friede vnd einigkeit machen / Aber die Lutherischen wollen nicht. Damit thut man vns gewalt vnd vnrecht / denn wir hetten gerne fried / vñ lieber denn jr / das weis ich für war / Aber wie kan friede vnd einigkeit werden / wenn man Gottes wort von beider gestalt zu hören vnd glauben / seine gebot vnd befelch zu halten / bey Leibsstraff verbent / Ja lestert vnd schendet / als ein newe falsche Lere / Vnd dagegen Menschen lere / vnd Tradition zu hören / glauben vnd annehmen vnd zu halten / so ernst vnd gestreng gebent? Dienet das zu friede vnd einigkeit? Ah man solt Gott nicht so spotten / noch versuchen / es ist warlich zu viel. Wie künde man doch Gottes zorn vnd straff höher vnd besser verdienen / denn damit / das sein göttliches wort von beider gestalt des Sacraments / als ein newe falsche Lere verboten / vnd dagegen des Papssts gebot vnd gesetz von der einen gestalt / als ein Christlich gesetz / geboten wird?

Wäre es doch kein wunder / das Gott vns mit der straff vberleitet / vberschüttet / vnd alle plagen / Hunger / Pestilentz vnd Krieg auff einen Hauffen komen liesse / wie wirs zwar bereit zum teil gewar werden / vnd fülen / Denn mit menschen Lere / gebot vnd Tradition leset sich Gott nicht versünen / Sondern damit / wenn man sein Wort höret / glaubet vnd annimpt.

W thut ir nichts / denn das ir die Leute mit Gewalt dringet vnd zwinget / Menschen lere zu glauben /

glauben / vnd ire gebot an zu nemen vnd zu halten /
Ists nicht offenbar vnd jederman bewust / das ir
Gottes wort von beider gestalt / verbietet vnd ver-
damnet / vnd zwinget die Leute zu des Teuffels lere /
das sie nur die eine gestalt des Sacraments em-
pfahen vnd nemen müssen? Desgleichen verbietet
ir die Ehe / das die Priester nicht dürfen Ehelich
werden. Item ir gebietet vnterscheid der Speise /
das sie nicht fleisch / Butter vnd Kese an den vers-
botentagen essen dürfen. Sind das nicht Men-
schen gebot / vnd teuffels Lere wie S. Paulus sagt?

1. Tim. 4

WArumb zwinget ir denn die Leute zu solchen Le-
ren vnd geboten mit gewalt Feuer vnd Schwert?
Wer hats euch befolhen / das ir wider Gott
vnd sein wort so toben vnd wüten solt? Wie seid ir
so frech vnd freuel / das ir wider den heiligen Geist
so öffentlich vnd vnuerschempt fecht vnd strebt /
damit ir nur Gottes zorn vber Deutschland erregt /
das es durch Pestilentz / thewre zeit vñ Krieg / wird
zu drümmern vnd zu grund vntergehen.

Denn es ist vnmüglich / das wir bey solcher
Tyranney solten glück vnd friede haben / da man
Gottes klare / helle wort / gebot vnd befehl von beis-
der gestalt des Sacraments / von der Speise vnd
Priester Ehe / so öffentlich / als ein Newerung ver-
dampt vnd verbent / schmehet / schendet vnd les-
tert / So es doch Christus vnser lieber Herr selbs
vor funffzehnhundert jaren eingesetzt / vnd den
Aposteln also zu halten geboten vnd befolhen hat?

amms. Ca

B

Ist

Ist das ein newe Lere? Ist das ein new
Gebot? Ist das ein newerung. / das die erste Kir-
che für funffzehnhundert Jaren geleret / geglenbt
vnd gehalten hat? Das euch Gott straffe. Ist
das die alte Christliche Lere / so die Mönche vnd
Pfaffen nicht viel vor drey hundert Jaren erticht
haben / aus eigener andacht / on Gottes wort vnd
befelch. Was Gott vns durch sein Wort gebent vnd
befielht / das mus bey euch new / falsch vnd vn-
recht sein. Was aber Menschen aus irem ei-
gen Kopffertichten / das mus euch die alte Christ-
liche Lere sein / Solt jr euch nicht billich schemen /
das jr euch solcher Reden solt hören vnd vernemen
lassen.

Aber solchs haben wir niemand zu dancken /
denn den bettel Mönchen / die nicht viel vber drey
hundert Jar in der Christenheit gewesen sind / vnd
solche newe Stück zum teil außgebracht / vnd
zum teil außbreitet haben / welche die Fürsten
vnd Herrn solchs bereden / das es recht vnd Christ-
lich sey / vnd sie vnd sich mit jnen so jemerlich ver-
füren vnd betriegen.

Denn sage an / Ist das die alte Christliche
Lere? Ist das der rechte alte Gottesdienst? den die
Mönche newlich vor etlich hundert Jaren erdacht
vnd erfunden haben? Oder der / so vor funffzehn-
hundert Jaren von Ihesu Christo vnserm lieben
Herrn eingesatzt vnd gestiftet / vnd allen Christen
zu halten geboten vnd befolhen ist? Ich hoffe jr
werdet je mit mir sagen müssen / das Christus ge-
bot vnd befelch elter sey / denn der newen newlich
außgetomen Mönchen ertichte Trewme.

Darumb

Darumb sind Fürsten vnd Herrn/Papst vnd
Bischove die alten gebot vnd befehl Christi vnser
lieben Herrn / aus Befehl seins himlischen Va-
ters/bey irer Seelen seligkeit zu leren/ glauben vnd
zu halten pflichtig vnd schuldig. Denn so spricht
Gott der Vater vom Himel herab/ Das ist mein
lieber Son / an dem ich wolgefallen habe / Den
höret/ Den/den / spricht Er / vnd keinen andern/
Wie auch der Herr seinen Jüngern gebet vnd
spricht/ Gehet hin/vnd leret alle Völker halten/
was ich euch befolhen habe. Nu hat Er inen bei-
de gestalt des Sacraments / nicht die eine allein
zu geben befolhen. Noch sind die verzweyelten
Buben so vnuerschempt / frech vnd frenel / das sie
mit der einen gestalt / so sie selbs newlich erdacht
vnd erfunden haben/Fürsten vnd Herrn so jeme-
lich verführen vnd betriegen/vnd die rechte/alte Les-
re von beider gestalt / So von Christo vnserm lies-
ben Herrn vnd Gott / vnd seinen Aposteln hers-
kompt/als ein newe/falsche Lere schelten/verdarn-
nen/vnd die Fürsten bereden / das sie solchs glau-
ben/Were es doch kein wunder/das der Donner vn-
blich/neun Ellen tieff sie vnter die Erden schlage.

Woraus wird nu offenbar/ das nicht jr ernst
ist/wenn sie fürgeben in der Religion/Fried vnd ein-
tracht zu machen / Denn sie wollen gar nichts
nachgeben / in keinem ding/ auch im geringsten
nicht weichen/Ja wollen in allen dingen recht vnd
wol gethan / vnd gar nicht geirret/haben. Wie
Kan denn vnter vns einigkeit/ vnd die Sache vers-
tragen werden / wenn sie nicht weichen wollen so
sie doch vnrecht haben? Bij Denn

Denn die Religion vnd Lere an jr selbs kan nicht verglichen noch vertragen werden/ Darumb darff sich niemand vnterstehen in der Lere vnd Religion eintracht zu machen. Denn sie sind stracks wider einander Contradictorie / ewre vnd vnser Religion. Ewre ist ein newe / falsche Religion / nur ein schein vnd schatten der Religion von Pfaffen vnd Mönchen lange nach der Apostel zeit erdacht vnd eingefatzt / als nemlich / die Opffermesse / die eine gestalt des Sacraments / vnd was mehr dran hengt. Dis alles ist die newe vnd falsche Religion / Denn Christus vnd seine Apostel / wissen von keiner Messe / von keinem Opffer / Sie wissen nichts von der einen gestalt des heiligen Sacraments / Sie haben das Volck mit beider gestalt Communiciert / keine Messe gehalten / Christus hat nichts nach irer weise geopffert / noch zu opffern befolhen .

Aber vnser Religion / ist die alte / rechte / ware Christliche Religion / so von Christo / vnserm lieben Herrn herkompt / da von sie auch jren namen hat / der hats alsd eingefatzt vnd gestiftet / vnd seinen Aposteln so zu halten befolhen vnd geboten / nemlich / Das man dem Christlichen Volck das gantze Sacrament beider gestalt reichen vnd geben sol. Also hats Christus den Aposteln gegeben / Also habens die Aposteln empfangen / Also hats Paulus seinen Corinthern gegeben / Also habens die andern Aposteln gehalten / Denn sie sind Christo gehorsam gewesen / da ist keine Messe / kein Opffer gewesen. Wie gefellt euch das? Stoffs vmb / seid jr böse / lasset sehen / was ewer Doctorat kan /

Kan / beweiset ewre Kunst / haben sie anders die
Leuse in ewren Kappen nicht gefressen.

Darumb Kan ewre Religion mit vnser nicht
verglichen werden / denn ewre Religion sagt / Man
sol Messe halten / Opffern für die Lebendigen vnd
Todten / das Volck mit einerley gestalt des Sacra-
ments Communiciren vnd berichten. Aber vnser
Religion leret vnd sagt / Man sol keine Messe
halten / Man sol nichts opffern / Man sol das
Volck mit beider gestalt berichten. Den das Sacra-
ment ist von Christo eingesatzt / das mans niessen/
essen vnd trincken / vnd seiner dabey gedenccken sol/
wie Er sagt / Nemet hin etc. Solchs thut etc.
Nicht das mans opffern sol. Nu können aber die
Todten weder essen noch trincken / Drum ist inen
gar nicht nützlich. Wer nu Kan / oder wil / der Con-
cordire vnd vergleiche beide Religion / Ich wil in
zu sehen.

Wolt jr aber ein vergleichung vnd fried ma-
chen / das wir eins werden / So wil ich euch ein gu-
ten Rath geben / der gewis ist / vnd nicht feilen Kan.
Nemlich / das jr höret den himlischen Vater / was
der euch sagt vnd gebent / dem folget vnd seid im
gehorsam. Der spricht also zu euch grossen
Herrn / so wol / als zu vns / wie oben angezeigt ist.
Das ist mein lieber Son / an dem ich wolgefallen
habe / Den höret. Da stehet des Vaters gebot
vnd befelch / wolt jr nu friede machen vnd haben /
so müsst jr hören / glauben vnd halten / was Chris-

B ij

stus

sius geboten vnd befolhen hat / Der spricht klerlich
vnd deutlich / Nemet hin / esset vnd trincket / dem
folget / vnd sonst keinem Menschen auff Erden /
denn dem / so Christus wort leret vnd prediget.

Wut jr solchs von Dertzen / so werdet jr freis-
lich von stund an ewre newe falsche Religion fal-
len vnd faren lassen / vnd die alte / ware / rechte Res-
ligion vnsers WErn Ihesu Christi annemen / das
mit die Christliche Kirche gepflantzet / gebawet /
vnd bisher erhalten ist / Wenn das geschicht / so
haben wir Fried vnd einigkeit vnternander. Wo jr
aber diesem Raht nicht folget / so ist's euch vnmüg-
lich / Fried vnd einigkeit zu machen.

Drumb rahte ich euch lieben Herrn / trewlich
vnd vntertheniglich / lasset euch die Mönche vnd
Mespaffen lenger nicht verführen noch betriegen /
Denn sie leren Menschen trewne vnd Tradition /
damit man Gott nicht ehren noch dienen kan /
Sondern sein nur spottet / vnd in erzürnet / Dazu
sind Menschen wort vngewis / liegen vnd triegen /
Aber Gottes wort ist gewis / leugert vnd treuget
nicht / ein jeder mag sich gewis drauff verlassen / er
kan nicht feilen noch betrogen werden. Das an-
der alles außer Gottes wort / es scheine vnd
gleiße wie heilig es wolle / ist mendacium vnd uanis-
tas / Lügen vnd vnnütze zur Seligkeit / wie der
Psalm sagt.

Erhalten lasset Mönche vnd Mespaffen
faren / vnd bleiben wo sie wollen / gedencet jr an-
ders Friede zu haben / vnd dem Vnglück empflic-
hen /

hen/so für der Thürist. Wo nicht/ so wird vns die
straff heuffig vberfallen/ ehe wirs gewar wer-
den. Denn mit Menschen tradition vnd Ceremoni-
en kan man Gott nicht versümen/ Sondern mit
rechtschaffner Busse vnd Glauben/ welche allein
durch Gottes wort vns gegeben werden. Dar-
umb ist dis der neheste weg/ zu fried vnd einigkeit/
das der jenige/ so vnrecht hat/ weiche den andern/
die recht haben/ vnd gebe Gott vnd der Wahrheit
die Ehre/ So haben wir gewis Fried vnd ewiges
Leben.

Ja sagen sie/ Es were wol etwas/ Wie darff
ich aber von der heiligen Römischen Kirchen weis-
chen vnd abtretten? Wer von der Kirchen sich
scheidet vnd abfellet/ der kan nicht selig werden.
Antwort / Das ist gewis vnd einmal war/ der da
wil selig werden / der mus in der Kirchen sein vnd
bleiben / Denn außser der Kirchen kan niemand
selig werden / weil in der Kirchen allein/ vnd sonst
nirgend gnade vnd vergebung der Sünde ist/ wie
wir im Glauben beten / Ich glaube eine heilige/
Christliche Kirche / gemeinschafft der Heiligen/
Vergebung der Sünde. Wo solt sonst gnade vnd
vergebung der Sünde sein/ denn in der Christlich-
en Kirche? Darumb ist von nöten/ das wir in der
Christlichen Kirche seien vnd bleiben.

Aber hie sihe zu/ wer vnd wo die Kirche ist/ vnd
was sie thut/ Auff das du dich selbs nicht betren-
gest/ vnd wenn du meinst du seiest in der Kirchē/ das
du nicht seiest in des Teufels schul vnd Sinagoga/
Die Jüs

die Jüden sagen auch / sie seien in der Kirchen /
desgleichen die Türcken / Papisten vnd Lutheri-
schen / jedes Teil sagt / sie seien Gottes Volck / vnd in
der rechten Kirchen / schelten vnd verdamnen alle
andere versammlung / als Heiden / Ketzer / vnd vn-
heilige Leute.

Joh. 10.

WER wil vns nu hie scheiden / vnd Richter sein /
vnd vns gewis machen / welche die rechte Kirche
sey? Ich halt es könne niemand besser thun /
denn vnser Herr Ihesus Christus selbs / Da Er
spricht / Meine Schafe hören meine Stimme /
eins andern Stimme hören sie nicht. So sind nu
Christi Schaf / die rechte Kirche / das ist / alle die
Christi vnser lieben Herrn wort hören vnd glau-
ben / sie seien wo sie wollen / allenthalben in der
gantzen Welt. Darumb ist die Kirche an keinen
Ort gebunden / weder an Rom / noch an Jerusa-
lem / Sondern wo Christus wort gehet / geleret vñ
gepredigt wird / da ist die Kirch Christi / Das ist
das erste / das wir wissen / Wer vnd Wo die Kir-
che Christi ist.

Ja sprichstu / damit werden allein die Tür-
cken vnd Jüden ausgeschlossen / vnd alle die nicht
an Christum glauben. Aber die Papisten / die weil
sie an Christum glauben / so müssen sie je die Christ-
liche Kirche sein? Antwort sie mögens wol sagen /
das sie an Christum glauben / Aber mit der that
findet sichs viel anders / Denn sie hören vnd glau-
ben nicht Christus stimme von beider gestalt
des Sacraments / Ja sie verbieten vnd verdamnen
diese

Stese Stimme vnsern Herrn Ihesu Christi von
beider gestalt / können vnd wollen sie auch nicht
leiden/weder sehen noch hören/Sondern sie hören
einander Stimme/von der Messe/von der einen ge-
stalt etc. Darumb sind sie nicht die Schaf Christi/
noch die Christliche Kirche/Den sie/die Papisten
Münche vnd Mespaffen / haben eben den Glauben/
den die Juden vnd Türcken haben/nemlich/
das sie durch ihre gute werck vnd Gottesdienste wol-
len Gnad erwerben/ vnd selig werden.

WIl hie auff dismal nicht weiter austreichen/
das sie Messe lesen/ singen für die Lebendigen vnd
Todten/Das sie die verstorben Heiligen anruffen/
Das sie den Priestern die Ehe verbieten / in Dure-
rey vnd Ehebruch/Ja noch viel ergers/sonderlich
iren Mespaffen/nach lassen etc. Welch stück al-
lein dem Antichrist / vnd seinem Reich/vnd sonst
keinem Potentat / auch der Weiden nicht / zuge-
eigent vnd gegeben werden. Derhalben können
Papist / Bischone vnd Cardinel in keinen weg die
Christliche Kirche sein. Vnd trotz/das sie ein
Wort dawider sagen oder mucken. Nu laßt ses-
hen/was jr hochgelerten Doctores könd.

Den da stehets fest vnd vnwidersprechlich/
das die Christliche Kirche ires Hirten vnd Herrn
Christi Stimme von beider gestalt des Sacra-
ments hören / gleben vnd annemen sol / wie die
wort Christi klerlich lauten / Meine Schafe hö-
ren meine Stimme / eines Frembden stimme/hö-
ren sie

S

ren sie

ren sie nicht. Daraufff gebt antwort / Pfeiffe nur
auff / so wollen wir frölich tantzen.

Als jr aber sagt / Man sol nach Gottes wort
alles richten vnd vrteilen / doch nach ausle-
gung der Veter / nicht wie es Luther auslegt.
Dierauff antwort ich / Das wir Gottes wort leren
vñ predigen / on alle Auslegung / vnd bewehren vn-
sern Glauben vnd Religion mit Gottes klarem / hel-
len Wort / das keiner Auslegung noch erklerung
bedarf. Vnd wenn jr ja wollet Veter haben / war-
umb nemet jr nicht an die alten / rechten Veter / die
lieben Aposteln / die von Christo Ihesu vnserm lie-
ben Herrn alles gelernet vnd gehört haben / was
man in der Christlichen Kirchen leren vnd predi-
gen sol. Wie geschrieben stehet / Der heilige Geist /
wenn Er komen wird / wird euch alles leren etc.
Wie denn solchs am Pfingstag geschehen vnd er-
füllet ist.

Aber diese Veter dienen euch nicht / wenn jr
denselben folgen vnd gehorchen soltet / So würde
ewre grosse Pracht vnd Herrligkeit nicht lange
wehren. Aber ewre newe Veter / so dem Papst
heuchlen / vnd ja für ein jrdischen Gott vnd Stat-
halter Christi rhümen / loben vnd preisen / dienen
euch wol zu ewren Lügen vnd irthumb / damit sie
vnd jr die arme Christenheit / nicht allein den Pö-
fel / Sondern auch Fürsten vnd Wern so jemerlich
verfürt habet.

Derhalben sollen vnd wollen wir keiner Men-
schen

schen Deutung oder auslegung/wie heilig sie auch
seien/folgen vnd glenben/Sondern allein Gottes
klarem/hellē Wort/das keiner Auslegung oder Er
klärung bedarff. Vnd wiewol viel dunkel vñ finstere
Sprüche in der Schrifft sind/die guter Erklärung
wol bedürffen/So brauchen wir doch derselben
nicht/vnserere Lere vnd Religion damit zu beweisen/
Sondern wir beweisen vnd bewerer vnsern Glaus
ben mit hellen/klaren/dürren Sprüchen / die mit
ausgedruckten Worten/ on alle Auslegung vnd er
klärung vnser Artikel gründen vnd beweisen.

Als nemlich mit diesem einigen Spruch/Ne
met hin/esset vnd trincket ect. beweisen wir vnser
Lere vnd Religion kreffig vnd vnwidersprechlich/
vnd stossen zu grund vnd bodem das gantze Bap
stumb / mit allen seinen Messen vnd Ceremonien/
so dazu gehören. Die in diesen Worten heisst vns
Christus nicht Messe halten oder opffern/Er heisst
vns nicht die Heiligen anruffen/oder für die See
len bitten/Sondern befiehlt vnd gebent Communio
nem populi, das man das Volck mit beider gestalt
des heiligen Sacraments communicirn vnd bes
richten sol/nemlich/das sie nicht allein essen/Son
dern auch das Blut trincken sollen/Vnangesehen/
wie viel oder wenig vnter einer oder beider gestalt
ist. Vnd wenn gleich vnter einer gestalt mehr we
re / denn vnter beiden/ So sol man dennoch das
helle/klare vnd dürre gebot Christi gehorsamlich
halten/vnd auch das Blut den Leuten zu trincken
geben.

C ij

WArumb

Warumb verbietet / schendet / lestert vnd vers
dampt jr denn den Kelch / als eine falsche / neue
Lere? Allein darumb / das jr der Römischen / Ba-
bylonischen Duren ein Eid geschworen habt /
Christum vnd sein Wort zu verleugnen vnd zu vers-
dammen / vnd das Thier / darauff sie sitzt / anzubes-
ten. Derhalben zwingt vnd dringt jr auch die
Leute mit gewalt / das Thier anzubeten / vnd seine
Malzeichen auff ire Dende vnd stirn zu nemen /
auff das sie kaufen vnd verkaufen mügen / oder
das sie nicht in die acht gethan werden. Was
künd jr lösen Wespfaffen hie zu sagen? Oder
was wolt jr am Jüngstentage dazu antworten?
Wenn Er euch fragen wird / warumb habt jr mein
Gebot vnd befelch / als ein falsche / neue Lere / ver-
dampt?

Nichts anders / denn jr müßt bekennen / das
jr der roten Babylonischen Duren vnd irem Thier /
das sie tregt / gedienet / dasselb geehret vnd angebes-
tet / vnd Menschen trewmen vnd auslegung mehr /
denn Gottes wort gegleubet vnd gefolget habt.
Wie wolt jr da bestehen? wenn jr mit dem Thier
vnd seiner Duren in den feurigen Pful werdet fa-
ren müssen? Daselbs mögt jr die Schrifft nach
ewer Veter auslegung glosirn vnd denten / so lang
jr wolt. Wir aber wolten mit Gottes hülfte bey
den durren / klaren vnd hellen Worten Christi vn-
ser lieben LErrn bleiben / sein Gebot vnd befelch
vnser lebenslang trewlich vnd vleißig leren vnd pre-
digen / vns vnd vnser Religion darnach richten
vnd

vnd halten/ vnd des Papsts/ seiner Münche vnd
Paffen auslegung gar nicht achten.

Als jr aber sagt / Man sol davon nicht dis-
putiren noch handeln/was vorhin in Concilijs de-
finit vnd beschlossen ist / hilff euch gar nichts/
Denn die Concilia haben offte geirret/vñ sind wider
einander gewesen/wie das die Historien vnd Chro-
nicken zeugen. Dazu ist des D. Luthers/ja Ihesu
Christi Lere vnd Religion / so wir itzt leren/ glau-
ben vnd halten / in keinem Concilio mit einigem
wort gedacht noch gehandelt/viel weniger etwas
dawider definit oder decidirt worden. Darumb
ist der Mesbischouen vnd Pfferpaffen einrede
ein mutwillige Ausflucht vnd ein lauter vnütz
Gewessch/das sie nicht ans liecht komen dürffen/
welchs sie schewen /als den Teufel/ vnd lieben die
Finsternis/wie die Nachteulen/denn jr Sache ist
böse. Wenn sie recht hetten/ vnd mit Schrift vn-
ser Lere vnd Religion widerlegen vnd umbstossen
künden/hetten sie vns so lange nicht frist gelassen/
Sonderlich die Malen. Solchs solt je die Für-
sten vnd Herrn billich bewegen / das sie sich für
den München vnd Mespfaffen fürsehen/vnd inen
lenger nicht glaubten noch traweten / wo sie an-
ders wolten Christen sein/vnd selig werden.

ES ist in keinem Concilio nie erhört noch er-
faren/auch nie mit einem Wort (wie gesagt) ge-
dacht oder gewehnet worden / was D. Luther
vom Papst vnd der Messe leret vnd schreibet.

C ij

Luther

Luther spricht/die Messe ist ein Grewel vnd Abgötterey für Gott. Der Papsst ist der rechte/wahre Antichrist / nicht allein seins Epicurischen lebens/sondern fürnemlich seiner Lere/Tradition vnd falscher Gottesdienste halben. Denn wenn gleich der Römische Hof Secundum Canones vnd Decreta am bestē reformirt were/So ist er doch des Teufels vnd seines Stathalters /des Antichrists zu Rom Reich. Wie gefellt euch Mespsaffen das? Kompt nu her vnd sprecht / Man dürffe nicht verhören/was vorhin in Concilijs definiert vnd decidirt / Lieber wo vnd wenn?

S. Johannes Duss/der heilige Martterer Christi hat wol den Papsst den Antichrist gescholten seins lebens halben/nemlich seins geitzs/Wurey/Sodomey/Simoney vnd hoffart halben/Aber das fechten wir nicht an / Er mag mit seinen geistlosen leben/wie sie wollen/das thut vns keinen schaden/Sie aber werdens wol inne werden/vnd erfahren /was sie thun / oder gethan haben. Aber seine Lere/Gesetz/vnd falsche Gottesdienste/sein Regiment vnd Ceremonien fechten wir an/vnd verdamnen sie/denn die thun vns schaden an Leib/Gut vnd Seel /Solchs alles zu handeln vnd beweisen / würde in diesem kurtzen Büchlin viel zu lang. Es ist durch den heiligen Man Gottes / Martinum Luthernum so klar vnd helle mit heiliger Schrift beweist vnd beweret / als die liebe Sonne am heilen Mittage/Wers nicht gleichen wil/der mag lassen/vnd dafür der Mönchen vnd

vnd Mespfaffen auslegung glauben/so wird er finden /was er haben sol.

Denn sie gründen vnd bauen iren Glauben auff der Peter auslegung / welche nicht anders sind / denn Menschen trewne vnd gedancken / die ungewis sind / vnd in der Not den Stich nicht halten .

Darumb bauen sie / wie Christus sagt / nicht auff den Fels / sondern auff den Sand / wie die Nasren. Derhalben jr glauben in dem Platzregen vnd Sturmwinde der Anfechtung vnd verfolgung nicht bestehen kan / sondern vntergehen mus.

Derhalben wollen wir vnsern Glauben mit S. Paul auff Christum vnd sein wort bauen vnd gründen / welchs der rechte Fels vnd Eckstein ist / den Gott selbs zum grunde gelegt hat / der gewis ist vnd feste helt / vnd euch mit ewrem Sande / der Peter auslegung / faren lassen / dar auff möcht jr mit ewren Heiligen / ewern glauben gründen vnd bauen.

Ze durch wird in ewer Geiffer vnd Gewesch offenbar / damit jr die Leute bisher verführt vnd betrogen habt / wenn jr sagt / man sol Gottes wort leren vñ predigen / nach auslegung der Peter / nicht wie sie Luther / der heilige man. Gottes ausgelegt hat / Solche ewre wort sind

sind eitel Lügen / so jr zum schein ewer Sache zu
schmücken fürwendet . Denn Luther bewert vnd
beweist vnser Christliche alte Lere vnd Religion/
mit keiner auslegung / wie jr anzeigt vnd lieget/
Sondern mit klaren/hellen vnd durren Worten der
heiligen Schrift die keiner deutung noch erkle-
rung dürffen.

Das mus ich euch abermal kurtzlich anzei-
gen/für die nasen halten / widerumb erholen vnd
repetirn / was droben gesagt ist / Dieweil jr auch
ewer alte Geigen in allen ewren Schrifften vnd
worten so offte repetirt vnd widerholet.

Im ersten sagen wir mit Luther/dem hei-
ligen man Gottes/das der Papsst der rechte ware
Antichrist ist / danon die Propheten vnd Apo-
steln geweissaget haben / vnd beweisen vnd bewes-
ren das mit keiner auslegung oder deutung / Son-
dern mit klaren/hellen vnd durren Sprüchen der
Schrift/die keiner erklerung dürffen/nemlich/das
der Papsst sich erhebt vber Gottes wort vnd die
heiligen Sacrament/das er die selben seins gefal-
lens vnd mutwillens lesterlich deutet / endert vnd
verkeret. 2. Thessa : 2. Ist dieser Spruch finster
vnd dunckel / das man in auslegen oder erkleren
darff? Zu dem verbeut er die Ehe vnd Speise/
1. Tim . 4 . wie die alten Ketzler zuvor auch ge-
than haben / Darff dieser Spruch auch einer
auslegung oder deutung?

Im andern / sagen / leren vnd predigen
wir/

wir / das die Messe ein Grewel vnd Abgötterey ist
von Menschen erticht/vnd von vielen Bepsten/wie
ein Betlers mantel zu samen geflickt/ damit man
Gott nicht ehren noch dienen kan/Sondern sein
nur spottet vnd in erzürnet/Quia scriptum est, Frustra
me colunt mandatis hominum. Darff dieser Spruch
auch ein deutung oder auslegung?

Zum dritten/ Sagen vnd leren wir on alle
Glose vnd Auslegung/ Das man das Volck mit
dem gantzen Sacrament / das ist / mit beider ges-
talt/wie sie reden / communicirn vnd berichten sol/
on alle Bepstische Messe. Denn da stehen die klä-
ren hellen durren wort Christi vnser lieben **DE**rrn
Nemet hin / esset vnd trincket etc. Die sitzt Christus
vnd communicirt seine Apostele / helt keine Messe/
opffert nicht. Darumb sollen wir thun/wie vnd
was Er gethan hat / vnd nichts anders / Denn
solchs gebent vnd befihlt Er seinen Aposteln/da
er spricht / Solchs thut / so oft irs thut / zu mei-
nem Gedechnis. Derhalben sollen wir nichts
opffern / noch Messe halten / sondern thun was
Christus vnser lieber **DE**rr gehan hat / nemlich/
Das Volck mit beider gestalt communicirn vnd
berichten .

He deuten wir nichts / wir glosiren noch
auslegen nichts / Sondern es ist ein klar Gebot
vnd befelh / vnser lieben **DE**rrn Ihesu Christi /
Nemet hin / esset vnd trincket etc. Warumb
D lestert

lestert vnd verdampft jr denn / solche klare/helle
wort / des lebendigen Gottes vnser **HErrn** **Ihesu**
Christi/als ein newe / falsche Lere / verführet vnd be-
trieget / damit Fürsten vnd **Herrn** / das sie die Leute
ymb des willen / das sie **Christo** vnserm lieben
HErrn vnd **Gott** gehorsam sind / verriegen vnd er-
morden.

Matt. 4.
Deut. 6.

Im vierdten leren vnd predigen wir / on alle
anslegung vnd deutung / Wan sol die **Heiligen**
nicht anruffen / Sondern **Gott** alleine / wie die
Schrift sagt. Du solt anbeten **Gott** deinen
HErrn / vnd **Im** allein dienen etc. Ist dieser
Spruch auch dunckel vnd finster? Darff er auch
einer erklerung? Dieweil denn dieser Artikel so
klar vnd hell ist on alle Auslegung / warumb ver-
dampft jr in den? Wisset jr nicht aus der Schrift /
das die **Heiligen** schlaffen vnd rugen / weder ses-
hen noch hören / vnd wissen nicht / was wir hie
auff **Erden** thun / wie sollen oder können wir sie
den anruffen?

Über das alles / wenn die verstorbene **Hei-**
ligen gleich im **Himel** weren / Doch kennen sie
weder der Menschen gedancken / seufftzen noch bes-
gird / welchs allein **Gott** eigent vñ gebürt / darumb
man auch **Im** allein anruffen sol / vnd sonst keinen
Heiligen / Denn wer ein **Heiligen** anruft / der
macht aus **im** ein **Abgott** / vnd gibt **im** die ehre /
so allein.

so allein Gott / vnd keinem Menschen noch Eng-
gel gebürt vnd zustehet / als der allein der Mens-
schen hertz / begird vnd seufftzen erkennet / wie
Psaln 7. geschrieben stehet. Quoniam tu Deus ius-
tus corda & renes probas, Vnd Jeremia 17.
Ich der HERR kan das hertz ergründen / vnd
die Nieren prüfen.

Daraus folget nu auch vnwidersprechlich /
das die Seelen / dieweil sie laut der Schrift / ru-
gen vnd schlaffen / kein marter noch pein im Feg-
feur leiden können. Darumb ist der Heiligen an-
ruffen / opffer vnd gebet für die Seelen / ein lauter
Teufels gespenst / so von jm herkommen ist / das er
im namen der verstorben Heiligen den Leuten er-
schienen ist / vnd begert hat / die Gebeine des oder
dieses Heiligen zu erheben / für den oder die zu bit-
ten / vnd so viel Messen für sie zu halten lassen /
das sie von der pein des Fegfeurs erlöset möchten
werden.

Dieweil aber von Todten etwas zu fragen
verboten ist / vnd wir aus dem Euangelio gewis
wissen / das die Todten nicht zu vns komen kön-
nen / So folget daraus vnwidersprechlich / das
vnrecht / falsch vnd abgöttisch ist / das man die
Heiligen anrufft / vnd für die Seelen im Fegfeur
bittet / vnd nicht allein vnrecht / falsch vnd abgöt-
tisch ist / sondern auch stracks wider Gottes wort /
gebot vnd befehl.

Esai. 8.
Luci 16.

D ij

208

Als dem schliessen wir vnwidersprechlich/
vnd trotzen nicht allein euch Mönchen vnd Mess-
pfaffen / sondern auch allen Engeln im Himel /
das jr dawider ein Wort mucken oder auffbringen
künd. Da stehen wir / vnd sagen frey vnerschro-
cken / aus Gottes wort vnd befehl / Das der Papst /
seiner Decret vñ Canones halben / der rechte Anti-
christ ist / Das seine Messe ein Grewel vnd Abgöt-
terey ist / Das man das Volck mit einer gestalt des
Sacraments nicht communicirn noch berichten
sol. Das man die Heiligen nicht anrufen sol.
Diese Stück stößet vmb / seid jr böse / beweiset ewer
Kunst / vnd lasset sehen / was jr künd.

Sieben wil ichs bleiben vnd wenden lassen /
Lauff das dis Büchlin nicht zu lang vnd verz-
drieslich werde. Denn wenn die Papisten die
Messe / das anrufen der Heiligen vnd das Fegfeur
verliessen / so würden sie nicht viel vom Papstumb
behalten. Dieweils denn gewis ist / das sie sol-
che Stück vnd Artikel verloren haben / vnd inen mit
Gottes wort aus der heiligen Schrift / wie oben
angezeigt / gewaltiglich genomen sind / vnd der
heilige Man Gottes / D. Mart. Luther / dieselbigen
Artikel mit hellen / klaren / durren Sprüchen / on
Glose / deutung vnd auslegung inen abgedrungen
hat / So ligt die alte vnd newe / beide der Papisten
vnd Adiaphoristen Messe / vnd aller Gottesdienst /
so daran henger / in der asche.

Vnd sind Papst / Mönch vnd Messpfaffen /
mit allen Thümen / Stifften vnd Klöstern zu grund
vnd

vnd bodem gestossen / Denn auff der Messe stehet
das gantze Papsthum / alle Klöster vnd Thüme /
Kirchen vnd Capellen sind vmb der Messe willen
gestufft vnd gebawet / Eigt nu die Messe / so ligen sie
alle in der Asche. Stehet aber vnd bleibt die
Messe / so bleibt vnd stehet das gantze Pap-
sthum / vnd wir Lutherischen ligen danider / vnd
haben verlorn. Das wissen die Mönche vnd Pfas-
ffen wol / darumb halten sie so hart vber der eine
gestalt des Sacraments / Denn wenn sie beide ges-
talt / wie es Christus vnser lieber Herr eingesetzt
vnd befolhen hat / nachliessen / so würde ire Messe
nicht lange bleiben / sie müßte zu grund vnd bodem
gehen / das riechen sie wol / sie haben den Schnup-
pen nicht.

Darumb raht ich euch Opfferbischouen vnd
Mespfaffen treulich vnd vleissig / wolt jr anders
bey ewer Pracht vnd herrligkeit bleiben / das jr on
verzug / mit gutem Grunde der heiligen Schrifft /
beweiset / das man sol Messe halten / die Heiligen
anruffen / für die Seelen im Fegfeur bitten. Wenn
jr das thut / So wil ich euch bey waren Worten /
trawen vnd glauben zusagen / das ich zu euch tre-
ten wil / widerumb ein Papist werden / vnd die Lu-
therischen mit euch auff's enfferste verfolgē helffen.

Wd irs aber nicht thut / noch thun könd /
so rahte ich euch freundlich / das jr vnwissende
Fürsten vnd Herrn lenger nicht verführen wollet /
sondern sie zu erkentnis der warheit komen lassen /

D ij

auff

auff das jr euch mit frembder Sünde vnd vnschuldigen blut nicht mehr beschweret noch beladet.

Vnd jr Herrn/ Ich bitte euch vnterttheniglich/ lasset euch nicht lenger verführen / es ist zeit / das Reich Gottes ist herbey komen vnd offenbar worden. Darumb schickt euch in die zeit / die Art ist an Bawm gesetzt / Leset es selbs / auff das jr gewis seid / was jr glauben oder verdamnen solt / Ewer vnwissenheit wird euch nicht entschuldigen. Ein jeder mus selbs wissen / was recht oder vnrecht ist / Darumb trawet vnd glaubet niemand / denn Gott vnd seinem wort / So könnet jr nicht irren / feilen noch betrogen werden. Denn Gottes wort leugt vnd treugt nicht / Aber Menschen können mit irer auslegung liegen vnd triegen / ja aller Menschen auslegung / wenn sie sich mit Gottes klarem / hellen wort nicht reimet / noch mit jm gleich zustimpt / so ist eitel Lügen / es scheine vnd gleisse so heilig / als jmer wolle. Wol euch / wo jr diesen meinen Rath folget / wo nicht / so bin ich entschuldiget.

Ik habt die walh / möget den Mönchen vnd Mespfaffen mit der newen Peter auslegung glauben vnd folgen / Oder den alten Petern / Christo vnd seinen Aposteln glauben vnd folgen / welche euch keine Auslegung / sondern Gottes / klare / helle / vnd dürre Wort fürtragen / welchs wir auch leren vnd predigen / on alle Dentung vnd Auslegung / nemlich / Das der Papst der Antichrist ist / der sich vber Gottes wort vnd die heiligen Sacrament erhaben hat / der die Ehe vnd Speise verboten / vnd

ten/vnd nur die eine gestalt eingesetzt hat / Das die
Messe ein Grewel vnd Abgötterey ist / Wolt jr nu
solchs nicht glauben noch annemen / So glaubt
dem Bapst vnd seinen Pfaffen / wir müßens gehen
vnd geschehen lassen / Allein wehret vns nicht /
hindert vns nicht / Gönnet doch vns / das
wir Christo vnd seinen Aposteln glaub
ben / wir können fürwar Menschen
vnd iren Auslegung nicht tra
wen noch glauben. Denn es
stehet geschrieben / Ver=
flucht sey / der Men=
schen trawet oder
glaubt .

Sap. 6.

Ungerechtigkeit verwüstet alle Land / vnd bö
se Leben / stürtzt der Gewaltigen stüle . So höret
nu jr Könige vnd mercket / Lernet jr Richter auff Er
den / Nemet zu ohren / die jr vber viel herrschet / die
jr euch erhebt vber den Völckern . Denn euch ist die
Oberkeit gegeben vom **HERREN** / vnd die gewalt
vom Höchsten / welcher wird fragen / wie jr han
delt / vnd forschen was jr ordnet . Denn jr seid sei
nes Reichs Amptleute etc.

Gedruckt zu Thena / durch
Christian Ködinger.

1555.

Handwritten text, likely bleed-through from the reverse side of the page. The text is mostly illegible due to fading and bleed-through.

15. 12. 18

Handwritten text, likely bleed-through from the reverse side of the page. The text is mostly illegible due to fading and bleed-through.

Handwritten text, likely bleed-through from the reverse side of the page. The text is mostly illegible due to fading and bleed-through.

M



ULB Halle

3

003 510 107







K. 215.
215.

12

Vg
1228

Unterricht vnd Ver-
manung auff's newe Jar/so ich
vor zweien jaren den grossen Herrn
dieser Welt geschanckt
habe.

Niclas von Amisdorff.

Psal. 24.

Machet die Thore weit/ vnd die Thüre in der
Welt hoch/das der König der Ehren einziehe.

Psal. 2.

SO laßt euch nu weisen / jr Könige / vnd laßt
nach züchtigen jr Richter auff Erden.
Dienet dem **HERN** mit furcht/ vnd frewet
nach mit zittern.
Küßet den Son / das Er nicht zürne / vnd
vmbkomet auffm wege / Denn sein zorn wird
ald anbrennen. Aber wol Allen / die auff In
trawen.

1555.

BIBLIOTHECA
CONICKAVIANA

UNIVERSITÄTS-BIBLIOTHEK
HALLE
(SALE)

